



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

ig tir_yimiyim

yt tir yimiyim

TAPAK 3

**Russia-i North Korean sepai tasumang
tejak rongdoker: Zelenskyy**

**January nungi Uttarakhand nung
Uniform Civil Code benoktsü: CM Dharam**



VOL. XXII ISSUE NO. 71 (ADOK 71)

DIMAPUR

YANGTEPNÜ (THURSDAY)

LUCHII (DECEMBER) 19, 2024

₹ 5.00

Assam nung Khristantem dak tai tongoktsür Thahekhu nung lanurtem züka merenshiba atema 3 apu

Guwahati, December 18, 2024

(Agencies): Assam nung Palashbari Legislative Assembly Constituency (LAC) kübok Valera yimtsü nung tamangba yimsü melendaktsür ta ashishitep ken o ka adokba atema Khristan teloktemi jangshitsüogo.

Iba dak sendakba nung Kamrup and Goalpara Christian Forum aser All Christian NGOs of Assam ajanga osangbener senden ka ayonga amen.

"Onoki tamangba yimsü melendaktsüba mapa meinyaker aser yimkdaklirtem Christianity dangi meyipdaktsüsü meranger ta aitsüba magizüker" ta Khristan teloktemi ashi.

December 4, 2024 nü Bherbheri nungi nisung 22-i Valera yimtsü nung alir kati ayongzükba Na Khawa (New-Rice Party) nung adenba sülen mangatettep adok.

Parnoki tamangba yimsü melendaktsüba mapa inyaker ta Valera nungeri tai tonglokja mepetmesü adoka raratep.

"Mrs. Nitumani Das-i onok Na Khawa nung adentsü jaok. Ajisüaka onok ki ka süngo jemer aludang lanur telok kati onok rara. Parnoki o tamajung shia rara, tetsür ka dak teka sangshi aser village Namghar-i onok atsür ao. Iba mapang Madhavi Rabha ta ser tantsür ka dak azük aser la indang gold earrings rakzüka bener ao" ta iba sentong adener tetsür kati ashi.

Onoki nashishi maben mesüra tamangba yimsü melendaktsüba mapa meinyak. Onok ya

missionary tem masü saka tamangertem lir. Onoki nisung shinga tamangba yimsü melendaktsüsü tebilemba maliasü aser yimdaklirtemi tai tongloktsüba ama nashishi bener mao ta tetsürtemi ashi.

Ajisüaka, Valera nung alirtemi ashiba agi iba telok yagi senotsü aser medical teyari agüja yimdaklirtem Christianity dangi meyipdaktsüsü merang.

Iba yimtsü nung kibong pezüi Khristan yimsü agizükogo aser tangalen nungi arurtemi Christmas stars enoktsü merangba ajanga temulung melemtep adok ta Valera nungeri ashir.

Iba tatalokba osang angashia police tiyongtsü ai saka iba ajanga mangatettep tuluba aküm.

Palashbari Police Station nungi Deputy Inspector Biswajit Das-i iba aonung tangalen nungi aruba telokji kümzüka pei talidaki meyipa yok. Tekka sangshiba atema Valera nungeri pezü aser tamangba yimsü melendaktsüsü mapa inyaker ta temulung melemer Ashim Rabha nunger police-i apu.

All Assam Garo Union President Rajesh R. Marak-i iba tatalokba aitsüogo. Tetsürtem dak teka sangshirtem aser tiyazü osang prokshirtem dak ozüng tapet agi merenshitsu ta Marak-i takhangba agütsüogo.

"Onoki iba tatalokba jungjunga bushisüngdangtsü aser takoksa ajururtem asoshi temeten agütsüsü mepishir" ta Marak-i ketdangsurtem dang ashi.

'One Nation, One Election' atema JPC tentetogo

New Delhi, December 18, 2024

(Agencies): Bodbarnü 'One Nation, One Election' bill atema Joint Parliamentary Committee (JPC) ka tentetba osang metetdaktsüogo.

Iba Parliamentary luden ajanga Lok Sabha aser state assembly elections külemi agitsüba bill asadangtsü. Iba luden nung Lok Sabha nungi MP 21 aser Rajya Sabha nungi 10 adentsü.

Mongulbarnü Union law minister Arjun Meghwal-i Lok Sabha nung Constitution (One Hundred and Twenty-Ninth Amendment) Bill 2024 aser Union Territories Laws (Amendment Bill) 2024 benoka liasü.

Iba bill ana ajanga Lok Sabha aser state assembly elections mapang ka nung agitsü shidanger aser Bodbarnü Rajya Sabha nunga benok.

Tanü bill benokdang MP 269-i bill pusema aser 196-i anema

votes enokja liasü.

JPC-i iba bill atema report ka renemtsü aser sangküm Budget Session mezüng Parliament-i bener arutsü ta tanü sorkar sangdong ka ajanga ashi.

Lok Sabha members

1. PP Chaudhary
2. CM Ramesh
3. Bansuri Swaraj
4. Parshottambhai Rupala
5. Anurag Singh Thakur
6. Vishnu Dayal Ram
7. Bhartruhari Mahtab
8. Sambit Patra
9. Anil Baluni
10. Vishnu Datt Sharma
11. Priyanka Gandhi Vadra
12. Manish Tewari
13. Sukhdeo Bhagat
14. Dharmendra Yadav
15. Kalyan Banerjee
16. TM Selvaganapathi
17. Supriya Sule
18. GM Harsh Balayogi
19. Shrikant Eknath Shinde
20. Chandan Chauhan
21. Balashowry Vallabhaneni

Dimapur, December 18, 2024

(TYO): December 16 aser 17 tsüngda aonung lanur pezü dak teka sangshir nisung asem Dimapur Police-i puogo.

Nyamo Lotha Road, Dimapur nung nisung ana amenba scooty aser lanur ana amenba gari tsüktep. Iba ajanga parnok tsüngda mangatettep adoka raratep aser idangji scooty nung mena alirtemi medemertem jaok aser parnok linük tenzükertem ta shia prangpong agi tui ter lanurtem züka merenshi.

Gari nung mena aliba lanur anaji Thahekhu yimtsüng kübok tesem kati anir ao aser parnok dang gari toktsür scooty bener aotsü ashi.

Idangji lanur ana jagi scooty maniteta atema tena yaritsü asoshi medemer ka aja. Iba medemer den pa adianu ka tesem tonga ao saka linük tenzükertem ta ashirtem jagi par pezüprong Thahekhu nung mezüng anir aoba tesem jagi tanaben anir ao.

Iba mapang lanur pezü rongnung kabo jena otet saka tanüngba dak züka merenshi. Par asemprong Dimapur nung nija mozü ki ka nung anepaludar.

Iba dak sendakba nung police-iapurtemji civilians ta ashir aser police-i maneni bushisüngdang südar.

Iba tatalokba ya Western Naga Youth Front (WNYF) aser Dimapur Ao Youth Organisation (DAYO) teloktemi sangdong balala ajanga aitsüogo.

Lanur pezü pur aoba aser Thahekhu yimtsü nung nija ki ka nung par asem züka merenshiba khukhua aitsür.

Linük tenzükertem ta ashirtemi tai maketba ozü adianutem dak tashiyim inyakba aitsür, ta WNYF-i ashi.

Asenok ajungtsü atema inyakerteri nisung pur aoba, amokmerenba aser teka sangshiba tatalokba aika ajuruba atema tebilemstü abener. Prangpong bener inyaksangshiba sobaliba magizüker aser ozüng amertem dang tapet mapa inyaktsü ayongzükter ta parnokisa ashi.

Telok balala nungi linük tenzükertem dang tashiyim inyakba anentsü aser nübertem akhümtsübuttsü ayongzükter. Bangdak ketdangsurtemi aibelenertem aputsü aser tai maketba lanurtem dak teka sangshirtem NSA kübok ozüng tapet agi merenshitsu ayongzükter, ta WNYF-isa metetdaktsü.

Tangatetba shitak alir ajaki iba inyakyim aitsüsü aser temeten meshitsü ayongzükter ta WNYF Interim President Aga Rengma-i sangdong ka nung ashi.

Thahekhu yimtsü nung linük tenzükertem ta ashirtemi tai maketba civilian pezü dak züka merenshiba aitsür aser iba nung Aor lanur ka densema lir ta DAYO-i ashi.

Parnok dak teka sangshiba tesem ya armed guards-i anükba tesem ka lir anungji iba ya India sorkar den ceasefire agreement aliba telok kar indang designated camp asü masü jangjatsü akhanger ta DAYO-i ashi.

Iba tesempatsü mapa nung Akato teloki shilem agi ta angashir anungji parnokisa osang

tejangja ka ashitsüla. Iba mapa ya India sorkar den ceasefire agreement alirtemi inyak asü mesüra linük tenzükter tenüng amer ozüng alema inyakerteri inyak? Iba tatalokba ajanga Dimapur sensotem asoshi tebilemstü bentsür aruogo ta DAYO-isa metetdaktsü.

Dimapur nung security inyakyim ana lir asü aser agency kari prangpong bener sensotem nem timtem agütsür asü ta bilemer. Iba amaji inyaker süra lendong keta lir anungji iba inyakyim anendaktsüsüla ta DAYO-isa ashi.

Nagaland Police-i parnok külen police ajanga tai inyakba atema bushisüngdang anungji Director General of Police, Nagaland lenisüba tajung kübok iba tatalokba atema bushisüngdang tekaratiba nung tembangtsü amanger. Iba tatalokba ya lanur pezü dak dang masü saka Dimapur nung alir ajak dang kongshiba ama lir, ta parnokisa ashi.

DAYO-isa CFMG/ CFSB Chairman dang taoba senden nung ground rules lateta aliba nung temelenshi kar asütsü nenshia metetdaktsüogo.

Maneni, National Health Mission Employees Association Nagaland (NEAN), Tenyimi Students' Union Dimapur (TSUD), Tenyimi Youth Organisation Dimapur (TYOD) and Dimapur Rengma Students' Union (DRSU) aser Western Sumi Youth Front (WSYF) teloktemia sangdong balala ajanga iba tatalokba aitsüba metetdaktsüogo.

National Highways mapatong meinyakra agientsü: TR Zeliang

Dimapur, December 18, 2024

(TYO): Deputy Chief Minister T.R. Zeliang-i Nagaland nung National Highway mapa inyakba maneni reprangtsü aser nungdakba ajitetdang state nung implementing agencies ajak den quarterly coordination meeting alitsü ta metetdaktsüogo.

T.R. Zeliang ya Planning & Transformation and National Highway atema Minister in-charge lir.

October 21, 2024 nü New Delhi nung Union Minister R&TH Nitin Gadkari den senden amendang jembitepba ama senden kar nungbo Regional Office, MoRTH Guwahati aser Ministry nungi ketdangsurtem jaoka amentsü.

2025 atema mezüngbuba coordination meeting ji January ita NPWD (NH), NHIDCL aser BRTF den amentsü aser idangji parnokisa ketdangsurtem inyakba

mapatongtem osang metetpelatsü.

November 11 nungi 14, 2024 tashi TR Zeliang-i district 6 nung NPWD (NH) kübok National Highway ajanga sema senzüa liasü.

Maneni, pai sangküm January ita NHIDCL kübok Highway mapatongtem sema senzüsü aser iba sülen BRTF-i inyakbatem reprangtsü.

Iba mapang Executive Director NHIDCL Kohima aser PMUs nung ketdangsurtem den bangdak Contractor tem tesem nung alitsü metetdaktsüogo.

NHIDCL kübok mapatong kar anendaka lir aser iba ya ali mechi nung lir. Ken o tem angatetteptsü atema Deputy Chief Minister-i Village Council Chairman, GBs aser Deputy Commissioner tem den ajurutepe sensaksemstü tebilemba lir.

Mapatong kar ali mechi nung küm aika meinyaktetsüa kümra

asur züngzüktsüba mapang nung meinyakra NPWD (NH) Department-i item mapatongtem agientsü.

Chief Minister Neiphiu Rio lenisüba kübok sorkari road connectivity atema kanga tongti süa bilemer aser iba jagi TR Zeliang-i iba mapa akangkanga inyaktsü tebilemba lir.

Deputy Chief Minister-isa sendaktepa alir ajak dang amalitep alitsü aser National Highway atema sorkar policy o temzüngtem sülen anidaktsü mepishia metetdaktsüogo.

Mapang shitak nung mapa tembangba ajanga state sorkari National Highway mapatong talila atema senotsü meshia inyaktsü tebilemba lir, ajisüaka tang lemzüka aliba mapatongtem meinyaktetra iba ajanga asenoki mapatong tasentem atema senotsü mangutsü ta Deputy Chief Minister-isa metetdaktsü.

Nütsüng züinba yari ki o jen tajung nüngdaker: CM Rio



Nagaland Chief Minister, Neiphiu Rio-i Dimapur Town Hall semzüksüdüng tangokba noksa anung angur. (Dimapur, Dec. 17, 2024)

Dimapur, Luchii/December 18 (TYO): Mapang talangka nungi kanga yongya aliba Dimapur Town Hall tajungba kuma yanglushir December 17, 2024 nü NSA Super Market, Dimapur nung semzüka liasü. Ibai Urban Development Department kübok jila nung ki o jen tajungba kumdaksüba nung tongtipang mera ka alitsü.

Nagaland Chief Minister Neiphiu Rio-i iba ki semzüksüba mapang Nagaland nung jila aser yimtittem kanga kera züinba indang lemsatsep aser 2011 census sülen jila nung nütsüng yongsük shilem 66.70 renlokogo ta ashi.

Iba terenlok litettsü asoshi ki o jen tajung nüngdaker ta pai ashi aser Dimapur ama urban centres nung senotsü indoktsü ayongzük.

2050 tashinung alima nung nütsüng yongsük shilem 68 bo urban areas nung alitsü ta takzüa aliba athishia rongsenketzüng peria alitsü asoshi urban aser rural nung terenlok sako asütsü tongtipang lir, ta CM Rio-i ashi.

Nübur ajungai amshitetsüa aser takum jenjang tajungba

kumdaksütsü mechi Nagaland sorkari talisa transportation, railways aser shishilempaba tesemtem nung ki o jen tajung yanglutsü nükjidong lir, ta pai ashi.

Tanü tensa nung nüngdakba ama Dimapur Town Hall ya takok ngua tajungba kuma yanglushiogo, kong osettsüset tajung amshi, audio aser lighting system tajung inoka lir, centralized air conditioning, safety measures tali agi, power backup lir aser tebour tajungba kuma yanglushiogo, ta pai ashi.

Iba town hall nung power connectivity inokshitsü aser danga mapa tem Development Authority Nagaland (DAN) nem nungloksü. DAN ya 1976 küm Nagaland Town and Country Planning Act of 1966 küm amenok aser DAN yagi ki o jen ktdangsüba, revenue generation aser self-financed development projects tem ktdangsüa inyaker.

Dimapur Town hall nungya benjengbentsü, tamangba yimsü dak sendakba sentong, kiyimba mesüra danga sentong balala agitettsü, ta CM Rio-i

ashi. Advisor, Tribal Affairs & Election, Government of Nagaland, H. Tovihoto Ayemia iba sentong ya yimti nung kakat tabu tasen ka tenzüka den sako lir ta ashi.

Iba town hall indang nüngshilong shidakba ya 1986 küm taoba chief minister S.C. Jamir-i azünga liasü, saka mapang süyia aoba ama yangji aliba osettsüset mamshiteti akum aser shibangtsüsa akum, ta pai ashi.

Advisor Tovihoto-i iba ki yanglushitsüba atema Chief Minister Neiphiu Rio dang pelaba lemsatsep aser ibai yimti asoshi Christmas sempet ka amai lir ta ashi.

Paisa nüburtem dang iba tesem arok meyong ama anepalua aser wazüka amshitsü ayongzüka liasü.

Iba sentong nung Chairman, Development Authority Nagaland, Dimapur, Dr. Watizulu Süzümeren-ia o tatsüka jembi aser Deputy Commissioner, Dimapur, Dr. Tinojongshi Chang-i melepzüng o jembia liasü.

Manipur nung Starlink satellite antenna ngutet

Imphal, Luchii/December 18 (Agencies): Manipur nung antenna aser router ngutetba sülen iba mangatettep ya tenzüka.

Tang mepetmesü adoka aliba mapang Manipur nung iba hadir ta amshi ta tai tongloksüba mapang pai iba sangdong ya agütsü.

Manipur nung security forces temi tesem ka meita

aoba mapang Starlink satellite antenna aser router ngutetba sülen iba mangatettep ya tenzüka.

Iba operation nung rifles tajung kar ngutet, anungji satellite nung amekdaka aliba internet service mashi lenmang nung amshi südi ta tamang makateti akum.

SpaceX ajanga alima tesem balala nung internet tesendaktep agütsütsü nükjidong nung Starlink ya yanglu.

Ajisüaka tangbo iba service ya India nung amshitsü memelar.

Police temi December 13 nü sangdong ka agütsüba nung, parnoki pua aliba Starlink oset ya Imphal East kübok Keirao Khunou area nung tesem ka meita aoba mapang telungpur temi yutsür jena ao, ta ashi.

Iba mapang parnoki satellite antenna, internet satellite router, prangbong, grenades aser injang-bomb tem nguteta liasü.



Directorate of Health & Family Welfare nung inyakerem Christmas yongya sentong December 18, 2024 nü DHFW lobby nung agia liasü. Iba sentong nung Dr. Mereninla Senlem, Addl. Director menden liasü, Dr. Thomas Keppen, Dy. Director ajanga sentong tenzüka sarasadem aser Directorate nung Senior Officers temi "What Christmas means to me" onük nung jembi, NSACS Staff temi temeja ken ka aten aser Jentinochet Amer-i anir Christmas carol agia liasü.

METETAKSÜR

Chuchuyimlang Kaketshir Telongjem Dimapur, 21st December 2024, 10:00am nung 48 Buba General meeting Kimen kidang (Mr.&Mrs.Nukshitemjen), Landmark colony (PWD) near children's park nung alitsü metetdaksür.

Sp.Rashiameren
Tir, CKTD

Kr.Imkonglemla
Tongti Zulur, CKTD

Noklak DPDB senden menogo

Dimapur, Luchii/December 18 (TYO): Noklak District Planning & Development Board senden December 17, 2024 nü MLA & DPDB Chairman, Benei M. Lamthiu lenisüba kübok Deputy Commissioner, Noklak indang Conference Hall nung mena liasü.

Iba senden tenzüka mendenpubai züngsemtem pelashishia agizük aser ketdangsür temi pei mapa nung temulung agüja inyakba atema pelaba lemsatsep.

Iba senden nung MLA P. Longon-i jembidang züngsemtem dang district tajungba nung renloksü asoshi census tejangja agitsü nüngdaker ta ashi.

Mapang tatsüka jembishinüba sülen board ajanga PHC Panso ya CHC dangi

upgrade asütsü aser Noklak nung District Commandant Home Guard & Civil Defence cum SDRF amenoktsü benokba agizüka liasü.

Senden nung PWD (R&B) aser Forest Department ajanga department inyakyim, tang teinyakdak project tem aser takok balala anguba indang PowerPoint presentation agüja liasü.

Iba senden tembanga Chairman Benei M. Lamthiu-i melepzüng o jembidang district terenlok asoshi züngsem temi anibelem mesasai lungjemer inyakba atema pelaba lemsatapa liasü.

Paisa züngsemtem dang maneni lungjemer Noklak district terenlok aser tejakleni aotsü atema mangdang ka yur maneni inyaktsü ajungshia liasü.

NCSU Advent Christmas mapang traffic police tem tushia amshi



Kohima, Luchii/December 18 (TYO): Nagaland Contractors & Suppliers Union pur tanü Hotel Japfu, Kohima nung Advent Christmas den best traffic award agütsüba sentong agia liasü.

Taküm best traffic award (tetsür) ya L/Nk Visekule (South Traffic Control) nem agütsü aser tebur rongnung traffic constable S. Benjamin Patton (North Traffic Control) nem agütsü. Parnok nem kulizüng kakat den senpet sen 10,000 agüja liasü.

Iba sentong nung NCSU tir Pele Khezhie-i jembidang, contractor temi tajungtiba nung inyakaka shilem ka nung aibelena lira nüburtemi temeyong toluktsür, ta ashi.

Anungji pai parnok dang tezü danga malitsü saka kati ka den yaritepa maneni state nung ki o jen tajungba yanglutsü ayongzük, kechiaser Nagaland nung industry tulutibaji contract aser supply ya dang lir ta ashi.

Mapang ajak nung traffic personnel temi traffic kanga junga ktdangsüa azüokba atema Khezhie-i pelaba lemsatsep.

NCSU tiri SP Kohima dang award angurtem service nung temaba jenjangi ajungkettsü mepishia liasü.

Sentong nung SP Kohima Teisovisie Metha-i jembidang, state nung NCSU ya teintet union ka lir, kong kin ajunga lungjemer state terenlok asoshi inyaker, ta ktdangsürtem aser züngsemtem tenüng sanga ashi.

NCSU ajanga 2013 küm asoshia pelaba lemsatsep aser state yimtiba nung traffic personnel dang pei mapa tajungba inyaktsü ayongzük.

Khezhie aser Metha nati ajak den Christmas aser New Year salem lemsatapa liasü.

Rengma Baptist Church pastor Jonathan Mesen-i tayongzükba o jembidang contractors aser suppliers tem dang pei mapa nung Tsüngrem mezüng südaksütsü ashi.

Iba sentong nung NCSU vice president N Neilo Koza menden liasü aser NCSU legal advisor Povotso Lohe ajanga sarasadema sentong tenzüka.

Iba sülen secretary Nzanbemo Tungoe-i pela agizükba o jembi aser vice president Manya Sipong-i melepzüng o jembia liasü.

Iba sentong nung Inato Assumi-i temeja ken ka ajanga lokti saksalemdaktsü aser NCSU advisor T Yanger Imchen-i sentong tembanga sarasadem.



Yisu Khrista asoba osang tajung jeli sangdonga jajaba sentong nung ya Dimapur nung alir ajak arua shilem agitsü jaoker. Iba sentong tali topur jungdakja pelateptsü asoshi nisung ajaki Christmas korang semer arua iba sentong nung shilem agitsü mepishir.

Featuring

MERANGKONG MARCHING BAND

STRETCH:

DABA Church premise to Clock Tower via Notun Bosti and back.

23 | DEC | 2024

STARTING FROM 6:00 AM

Organised By

MERANGKONG SENSO TELONGJEM DIMAPUR

Special Request: Please bear with us for partial disruption of vehicular traffic



One Nation One Election Bill asadangtsü atema JPC tentettsü

New Delhi, Luchii/ December 18 (Agencies): Lok Sabha aser state Assemblies election ajak külemi dang agitsü atema benokba "One Nation, One Election" asadangtsü atema züngsem 31 adenba committee ka tentettsü. Mongolbarnü Union Law Minister, Arjun Ram Meghwal-i Lok Sabha senden nung kanga tongtibang Bill ana benoka liasü. Lok Sabha aser state assembly elections külemi dang agitsü atema Constitution Amendment Bill ka benok. Iba denki külemi Union Territories den National Capital Territory of Delhi nunga elections külemi dang agitsü atema temeja bill ka benoka liasü.

"One Nation, One Election" Bill asadangtsü atema Joint Parliamentary Committee (JPC) ka tenteter aser iba Committee nung züngsem 31 shimtsü. Züngsem 31 nungjagi 21 bo Lok Sabha nungi MP tem asütsü. Lok Sabha Speaker Om Birla-i iba committee atema sangdong agütsüba sülen ghonda 48 tsüngda committee tentetba maparen ajak atemtsü, mesüra mapang süiadoktsü aser taruba senden nung ang tanaben benoktsüsa akümtsü. Iba committee nung züngsemtsü atema party balala dang peipei MP tem tenüng meshiogo. Parliament nung largest party sasep nung Bharatiya Janata Party (BJP) nungi züngsem

teimba shimtsüa akok aser Chairman jia BJP nungisa asütsü. Kodang committee tentetba maparenji tembangdir report renemtsü atema committee nem anogo 90 mapang agütsütsü; ano nüngdakra mapang agütsüsemtsüa akok. Anogo 90 tsüngda committee-i committee nung maliba MP tem, linük temzüng nung mongintem, taoba mapang judges, lawyers aser taoba mapang Election Commission (EC) nung züngsemtem densema stakeholders ajak dak tebilemba asüngdangtsü. Iba sülen committee jagi iba bill jungjunga asadanga report renemtsü aser tebilemba onüktem benoktsü.

NSA Ajit Doval aser China Foreign Minister Yi na senden amen

New Delhi, December 18 (Agencies): Bodhbarnü National Security Advisor (NSA), Ajit Doval aser China foreign minister, Wang Yi na senden mena China-India arrtsülen mangatettep onüktem nung o lemtepogo, ta ketdangsertemi metetdaksü. Doval leniba nung India nunger ketdangsertem 23buba Special Representatives senden nung adener. Iba senden ya küm pongu shia khen amener. Tesüsabuba sendenji 2019 küm Delhi nung ayongzüka liasü. Taküm October 21 nü India aser China nati anüdoklen

Ladakh nung sepaitem aienshitsu aser patrolling tenzüksü atema telemtetba agiba sülen tang mezüng tongti ketdangser ana tsüngda senden amener. China foreign ministry-i sangdong ka ajanga, linük ana tsüngda lenirtemi tangatettep nung telemtetba agia inyaksü aser linük ana tsüngda tesendaktep tajungba akümtsü asoshi inyaksü China-i melunga dang lir, ta metetdaksü. Doval aser Yi na senden amentsü jakdang China foreign ministry otongdar, Lin Jian-i, linük anapronglai peipei tangatetbatem aser taginüba

akhümtsübutepstüla, ken o jembiba aser tongtepratep ajanga tamang akaba jenjang tashi itshitsüla aser mangatettep ken otem bentettsü atema nendaka inyaksüla, ta metetdakja liasü. Parliament nung External Affairs Minister, S Jaishankar-i, anüdoklen Ladakh nung China aser India sepaitem aienshiba maparen tembangogo, ta metetdakja liasü. Taküm October ita nung India aser China nati India-China arrtsülen Line of Actual Control (LAC) nung patrolling tenzüksü atema bangjema liasü.

January nungi Uttarakhand nung Uniform Civil Code benoktsü: CM Dhami

New Delhi, December 18 (Agencies): Uttarakhand state nung Chief Minister Pushkar Singh Dhami-i aniba sorkari sangküm January ita nungi Uniform Civil Code (UCC) mapa küma benoktsü; India nung UCC mezüng benokba state ji Uttarakhand akümtsü. State sorkari, "Registration agitsü, temepishiba agütsütsü aser tanga services atema portal ka aser mobile app ka renemogo," ta metetdaksü. Uttarakhand CMO-i X ajanga, "Chief minister-i sangküm January ita nungi Uttarakhand nung State Uniform Civil Code benoktsü ta metetdaksüogo. Uttarakhand nung Uniform Civil Code ozüng ajanga loktiliba nem lenmang tasen ka agütsütsü. Iba ozüng ajanga tashi agütsütsü asoshi kishi tasen lapoktsütsü, talisa tetsür aser tanurtem nem tashi agütsütsü," ta metetdaksü. Chief Minister Dhami-i ketdangsertem dang iba ozüng benoktsü atema facilities ajak renemang aser training shidak agüjang, ta tuyuogo. Taküm March 11 nü Tiri UCC Bill nung sign asüba ajanga

iba bill ozüng akümtsü atema lenmang lapokja liasü. Iba sülen state sorkari temzüng renemtsü asoshi züngsem 9-i akümba committee ka tenteta liasü. Iba bill nung schedules tenet aser Arlla 392 lir, talisa iba ozüng ya kiyimba, balalulaba, senmang aser kibong mekümi külemi aliba nung rangloker yanglu. Iba dak alia tetsür ka kinüngbu ana mesüra teimba den aliba mesüra tebur ka kinüngtsü ana mesüra teimba den aliba nokdangtsü aser tetsür-tebur nem senmang tsütsü kasa temeden agütsütsü atema lateta lir. UCC kübok kibong tasen akümertemi ita trok tsüngda register asütsüla. Hopta ana tejaklen Ato kilonser Narendra Modi-i Uttarakhand sorkari UCC ozüng benokba atema state nem tenüngsang agütsü liasü. Modi-i, "Kanga junga shisadanga sülen Uttarakhand sorkari UCC benoker aser iba ya chichiba 'Secular Civil Code' lir ta ni züngshir. Linüki UCC atema jembir aser iba ya nüngdak ta bilemer," ta metetdakja liasü.

AAP-i 'Sanjeevani Yojana' scheme sangdong



December 18, 2024 nü Delhi Chief Minister Atishi aser AAP National Convener Arvind Kejriwal nati 'Sanjivni Yojna' sangdongba sentong nung shilem agidang tangokba noksa nung angur. Iba scheme kübok arrshi küm 60 ser temapur sensotem nem angati medical treatment agütsütsü.

New Delhi, December 18 (Agencies): Delhi nung Assembly Elections agitsü joko ita ana shi dang lia Hokolbarnü Aam Aadmi Party (AAP) tongti lenir aser taoba mapang Delhi CM, Arvind Kejriwal-i sorkar hospital aser nija hospital naprongla nung teintet sensotem nem angati medical treatment agütsütsü sangdongogo. Kejriwal-i, 2025 küm election nung takok ngua AAP-i maneni sorkar akümba sülen par party-i 'Sanjeevani Yojana' scheme kübok arrshi küm 60 ser temapur teintet sensotem nem medical treatment angati agütsütsü, ta metetdaksü. "Nenok anepalutsüji onok teinyaksü mapa lir. Iba linük tejakleni anitsü atema nenoki kanga meranga inyakogo," ta paisa metetdaksü. "Treatment nung sen adokba arlla kecha malitsü. Anogo kana tsüngda registration tenzüksü. Registration agitsü atema AAP nung inyakterem nenok kidangi arutsü. Parnoki

nenok nem card agütsütsü, anungji ibaji junga rizünga yuang. Election nung takok ngua sorkar akümba sülen onoki iba mapatong mapa küma inyaksü," ta pai metetdaksü. Taküm October ita nung osangbenertemi Kejriwal dang, kechiba Delhi sorkari central sponsored Ayushman Bharat Pradhan Mantri Jan Arogya Yojana scheme benoka inyaksü memelunger?, ta asüngdanga liasü. Iba tasüngdangbaji langzüdang Kejriwal-i, linük yimtiba nung iba scheme ya menüngdak, kechiyong AAP sorkari yimti nung alirtem nem sen crore 1 tashi angati treatment agütsür, ta metetdakja liasü. Kejriwal-i, "Delhi nung mozü, temang tendangba aser treatment ajak angati süra yangibo Ayushman Bharat scheme menüngdak. Modi-i Delhi healthcare scheme ya asadangtsüla, iba sülen linük tesem ajak nung benoktsüla," ta metetdakja liasü.



TIR YIMYIM YIMOBILEM (EDITORIAL)

DIMAPUR YANGTEPNÜ, DECEMBER (LUCHII) 19, 2024

Asenok nükjidong ulushitsüla

Akhi mapang asenok azüng-zülu memetetba mapangbo, asen tsüraburtem nükjidong tulutibaji tsük lu tuluka ayimtsü aser tsüksüngonsüng süra nashi aser sü achitsüsa takar küma alitsübaji dang liasü, kechiyong tanü putu nung ama 'business' aser 'office' nung inyaktsüba mapa mali asü. Iba sülen asenok azüng zülu meteta kümer külen kaketshirtem ajunga nükjidongji government mapai aitsü asoshi nükjidong yur azüng, anungji zünger government mapa mangurtemjibo tamakoker aser takidak makatsü purtem ama züngshi. Aji oda, government mapa tilaka danga mengura metsüa memeyoktettsü ama bilema metsü meyoka alitsü atema danga government mapa tilakabosa inyaka alitsüla ta bilem. Ibayongji, asenoki metetsümonga asenok Aotsür Aoertem dang masü saka Nagaland nung alir Naga nung shia taküm nung nükjidongji government mapa nung ita sen chia alitsü asoshi merangteptsüba dak alaka tanga inyaktsübo tebilema mebilem. Iba jagi asenok asoshibo peisasa lenmang bushia 'business' inyaktsüba ya züngtozünggrartem mapa amato aküm, anungji tenükshia menükshi. Atangji, tanübo asenok rongnunga junga shia metetertem aika peisasa business lenmang tapu balala bushiteta takar küma inyakerterem lir, ajsüaaka tang tashia asenok nükjidong memelenshii dang asenok kijai dang masü saka loktia 'business aser entrepreneurship' nung masü saka government mapa nung dang rangloka lir. Iba jagi asenoki tenüngsang aser tetushi ajak government mapa nung jenjang tulu ngua 'Civil Service nung Civil Servants' akümertem nem dang agütsüba asenoki angashir aser angur. Ibaji shitak aser junger, kechiyong parnokji government nung tongti ketdangsertem asütsü, ajsüaaka parnokji government nung kibur masü saka kilirtem lir, kiburji mazüng memetetba nisung asüyonga tatar yimsüsür MLA aser MP kümra, parnokji dang asütsü, anungji parnok kübokji Civil service nung alirtemji civil servants asütsü. Atangji, yangi shinübaji Civil servants mezüngshirba masü mesüra Civil servants makümtsü ajungshinür-a masü saka asenok asoshi tanü putu nungbo civil services dang nungibo ano tokolok aser shisatsü agi atonger asoshibo alima nung peisasa apiteta business inyaker Elon Musk, Mukesh Ambani aser Gautan Adani nung ama akümtsüa koka lir. Parnok yagi government anir, kechiyong parnok ket nung rongsen lir. Ajsüaaka, tatishitsü agi tanü putu nung ya Elon Musk, Ambani aser Adani nungertemji asen kin aser asenok nisung ka asünunga parnoki parnok asoshi dang masü saka alima nung alir aika nem mapa agütsüba aser rongsen yanglutetba asoshibo lokti shingaia tenüngsang ojang kata magütsüla, kechiyong asenok nükjidongji parnok ama akümtsübaji masü saka Civil servants akümtsü asoshi lir. Iba tangatetba aser tanü asenok nükjidong ya kodang bilemdangdir, asenok ya kibur akümtsü meranger masü saka kilir akümtsü merangtepertem lir ta asenoki asenoksasa angatettsü. Aji oda, tang tashi asen kin kolok nung abenba map-ji government mapa lir, anungji government mapa angutsü asoshi dang azünger aser government mapa mangurtemjibo mapa maka kazütsü purtem amai dang asenoki bilemer. Iba map-ji ulushitsüla aser kasa map nungji business aser entrepreneurship-a enoktsüla aser itemji asenok nükjidong akümtsüla. Iba amaji kodang asenoki asenok nükjidong ulushidir, asen lima nung government mapaji dang masü saka mapa adokdaksür aser rongsen poktetdaksürtemji asenok asütsü. Iba jagi dang asenok tashi tait kin ka kümtettsü. Iba tangatetba nung asenok rongnung tadok dang adoktetra aser taküm dang kümtetra, Aor Elon Musk, Aor Ambani aser Aor Adani nungertem nema tenüngsang agüja tushitsüla. Kasaji, government mapa nung dang masü saka peisasa mapa bushiteta inyaktsü asenok rongnung kanga ajungshiteptsü nungdaker. Ibaji government mapa angu tasakba akümba agi masü saka government nung kilirtem dang masü saka government anishitsü purtem akümtsü nükjidonga ayutsüla ta angatetba agi asütsüla.

OLEMSABANG

MEIMCHIR RONGNUNG YIMJUNG: KHRISTMAS

~ Alemla Longchar

Khristmas kenten, ki sobotsu naro, Khristmas jilo-shitem, benjongmong, yamala ajak agi Khristmas ronem agi sunogo. Jangratemtsuka. Saka alima aika nung azudokshiba agi sunga lir. Nuburtem aika nuksu nung shisabulua yimjung yongya atadagi. Yimjung asoshi naia kechia inyaktsu.

Atangji, Khristmas mapang Yisu asodak yimti aser temeket limatem aika, asen kiyonger Myanmar nung, aser India nung Manipur nung anogo shia rara, injang-bomb ola, tasuba, teraksa-tesama, ki-o-jen rongdoktsur nuburtem aika talidak maka refugee camp nung timtema mozu mali, strike, chiyungtsu peria maka tasu-takum tsungda okrongbatem osang angashir. Talisa, tetsur tashiyim agi raksatsuba, tepsetba aser kinu tanu tashi pur oa tepsetba angur. Item mapa tamajungtem ajanga, nuburtem temulung zurepa tetsubu, aser taoksa, talisa tila tanurtem, tantsur-tambur tejak nung tetsubu jakden tener, nubur aika mangyim nung khu-khua temulung shiranga aser tajepba tia nung lir. Iba ama tensa ka nung, anütsung sangwa-sangwa yaloktsu ama, alima meimchir ajak dangi teimla tasen ka, yimjung aser tesenep Osangtajung ola bener Khristmas-i bener arutsur.

Tsungremi meimchir, Pa mesukba nung yanglu. Tsungremi yangluba takum ajak senti aser Tsungremi yangluba takum kaji pei tashi ajungkettsu atema ajemrapa yutsuba aser tepsetbaji temenem mapa tulutibaji lir. Reprangang tanu tomb tesashi amshia, shiruru den sako meimchiri meimchir arishiteper aser tepseba osang agi sungogo. Ashiko, iba ocet tezungdak nunga, tai maket nubur aika rara balala nung takum samadagi aser samar alitsu. North East India nunga, talisa Nagaland nung, nuchiso bushir telok 27 tashi telemsa adoker mepetmesu adoka lir. Yimjung indangbo jembir, saka taitok aser temulung melenshir aotsuba mejangrar ta asuba tia nung lir. Tashi tokdoktepba agi alima raksar. Ano kiralongraer onsaraba den yimden lenir state level nungi yimtsung tashi nung ochimashir jenti aliba ajanga Nagaland nung terenlok mali nuburtem tepetzuk tia nung aliba angur. Iba ama jenjang ka nungji Khristmas tetezu kechi?

Akhumtsuba ajanga yimjung bener arur. Tamangba yimsu ajaki yimjung indang jembir aser sayur. India lima ama kong tamangba yimsu, sobaliba, shilu, oshi balala aika lir, yangli tamangba yimsu ka dang, oshi ka dang jembitsu aser telok tilatem ajemrepa yutsutsu merang nungbo yimjung kodanga malitsu. Tia maka tang BJP anina teloki nuburtem tamangba tsutsu lemsa ayutsu merangba dang masu, tanga yimsu India nungi samadaksutsu meranger. Anungji kati ka dang akhumtsubu sayuba aser kati ka agizuktetba ajanga dang yimjung bener arutsu makok. Kati ka magizuktetba ajanga tanu Manipur nung tenlaki noklang ana tema rokdoke/raksatsur lir. Iba ama jaka nungji Khristmas koda amongtsu? Prangprong, tashiyim ajanga nisung aika refugee camp nung lir aser parnok Khristmas sadok sadoka koda mongtsu? India tesem aika nung Tsungrem tenzucker rishikangshiba aser tekulem ki raksatsuba/rongtsuba ajangshia arudagi. Yisu Khristai meimchir ajak asoshi yimjung bener arutsu. Temem aser kati ka akhumtsubu ajanga dang yimjung bener arutet ta metetdi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Yisu indang ai korang Notre Dame Tenla kidangi bener ao



France yimtiba, Paris nung aliba Notre Dame Tenla kidangi Yisu Khrista indang ai korang tanaben bener arudang tangokba noksa nung angur.

December 18, 2024: Yisu Khrista Kangki nung metatsü lia Pa nem semtsüba ai korang taoba Hokolbarnü (December 13) Notre Dame Tenla kidangi tanaben bener ogo.

Küm pongu tejaklen France yimtiba, Paris nung aliba Notre Dame Tenla ki arongba mapang nung ai korangji densema oset aika kümzüka liasü.

Hokolbarnü Archbishop Laurent Ulrich leniba nung ai korangji Tenla kidangi tanaben bener oa toktsü. Yimdong süa jajaba sentong nungji Order of the Holy Sepulchre nungi nisung

400-i shilem agi, parnok rongnung knights 200-i Yirusalem Kangki temeren aketba süoshi temesung semer liasü.

Iba ai korang ya mezüing Aso 5buba mapang nung Yirusalemi temeshi aini aoertemi metetdakja liasü, iba sülen Aso 10buba mapang nung Constantinople nem agütsü. 1239 küm Constantinople-i France King Louis IX nem ai korangji agütsüba sülen pai Paris yimtii bener aru aser Notre Dame Tenla kidang ayu. Iba korang kümzüka ayutsü

atema Sainte-Chapelle nung ayu saka tanaben Notre Dame Tenla kidangi bener ao.

2019 küm Notre Dame Tenla ki arongba mapang nung ai korangji kümzüka sülen Louvre Museum nung khenpiga atema rizünga liasü. Iba Tenla ki tanaben süshiba sülen tawa semzüko. Notre Dame nung sangküm January 10 nungi tenzüka Good Friday tashi Hokolbar shia ai korangji sayatsü; tanünga anogotem nungbo ai korangji Notre Dame nung aliba marble altar telung nung shibanga ayutsü.

Vietnam linük nung ano pastor ka dak injang khaloktsü

December 18, 2024: Vietnam kükok Central Highlands nung tawa pastor ka injang agi yirutsüba sülen maneni ano pastor ka injang agi yirutsüogo, ta International Christian Concern (ICC)-i metetdaksü.

Independent house church ka nung pastor arrshi küm 57, Y Pho Eban-i aniba house church ji Vietnam nung communist sorkari melaba Arogo nung register süa mali.

Vietnam nung sorkari melaba Arogoji Evangelical Church of Vietnam lir, ajisüaka Protestant pastor, Y Hung Ayun aser pastor Y Pho Eban nati aniba house church anaji sorkari melaba Arogo nung register masü.

Tawa nisung ana motorbike nung aruba sülen Pastor Ayun dak temekok nung injang khalokja liasü. Tang police-i pa dak tenük yokdar.

Ano Pastor Eban-a pa

meyong coffee lu nung mapa teinyakdak mapang nung kari pa dak tetsung nung injang khaloktsü.

Pastor Eban'er Arogo nung züngsem 200 shi lir. Tebu, Y Quynh Bdap-a Thailand linük nungi anir arutsü atema Vietnam sorkari inyakdar. Pa linüki anir aru nungbo pa anema ken o akatsü aser reshikangshitsüa akok mesüra tasüba temerenshi-a agütsütsüa akok.

Nicaragua sorkari linük nungi nun ajak aienshitsu tuyu

December 18, 2024: Nicaragua nung sorkari Arogo anema maneni inyaka sorkari linük nung tanünga nun tem ajak linük nungi aienshitsu tuyuogo, ta International Christian Concern (ICC)-i metetdaksü.

Meimchir temeden atema inyaker, Martha Molina aser La Croix International-i ashiba agi, December ita tembang tashi nung nun ajak dang linük toktsür aotsü tuyuogo.

Molina-i, "Nun tem melungtet telok balala nung inyakba anendaktsüogo aser parnok meyong kiojen ajak rakzükogo. Parnok teimbakati linük toktsür ogo," ta

metetdaksü.

2018 küm nungi tenzüka Nicaragua Tir, Daniel Ortega-i Arogo dak sendakba organizations aser melungtet teloktem anema inyaka arudar.

2018 küm nungi tenzüka tang tashi nung Catholic Arogo nung lenir 245 linük nungi meindokogo. Taküm August ita nunga Jesuit religious order nokdang aser kiojen ajak rakzüka liasü. Ita ka shi lir Anglican Arogo anentsüogo aser Arogo meyong kiojen ajak rakzüka liasü. November ita nungi tenzüka sorkar hospital tem nung shirangertem atema sarasademtsütsü asoshi putirtem nem temelaba

magütsür.

Taküm küm tetenzüklen Nicaragua sorkari Catholic aser Protestant melungtet telok noklang aika densema melungtet telok 1,500 anentsüba sülen alima linüktemi Nicaragua sorkar sashia aitsüogo.

Christian Solidarity Worldwide (CSW) nung Head of Advocacy, Anna Strangl-i, "Tir Ortega aser tatong Tir Murillo na leniba nung sorkari linük nung independent telok ajak anentsütsü nükjidong nung inyaker. Organization aika anentsüba ajanga tetsür-tebur aser tanurtem aika mejungi kongshitsü," ta metetdaksü.

ANO GO ABEN TSÜNGREM DEN

Kangki apuang

"Shibai-sa pei kangki mapu-i kü sülen anidaker, pa kü nütsüng mekümtet" (Lk. 14:27).

Shin o ka nung yamai ashir, tekümtet-ji tesadem nüchi, saka nütsüngsüba-ji jenjang lir. Asenoki asen taküm asoshi kangki aser temeim naji kodanga mepilatetsü. Khristan ka asoshi kangkiji taküm nung anogoshia leniba ajok lir. Amangbapur ka aterna, kangki pa/la taküm nung melira, pajibo anemsü lir.

Tejen Lai mapang nung kangki temetetbaji mali asü saka Tasen Lai mapang nungbo; tamajungpurtemji kangki nung metaloka südakja liasü. Alexander Tanneusi nübur 800 kangki nung angenlok, aser tematiba Herodi nübur 2000 kangki nung angenloka liasü. Asen Tsüngrem Yisu Khrista kasa kangki nung angenlok. Pa dak tashiyim amshia kangki apudakja liasü. Yisui lokti nung jembidang, pai ashi, "Kari kü sülen arunüra, pai pei sasa azüokang, aser kangki apur kü sülen anidakang." (Mt 16:24) Anogoshi ne dak pei sasa bendanga agütsüba aser pei sasa tenlaba den tangar yaritetba asütsula.

India nunger Christian Theologian Sadhu Sundar Singh-i ashir, Kotak asoshi sabiji kangki. Shirnoki kangki abener ibaji Kotak matong tashi abentsüla.

Arogoi South Korea linük atema sarasademtsü ayongzük

December 18, 2024: December 14 nü South Korea National Assembly nung 'impeachment motion' benoka Tir Yoon Suk-yeol agienba sülen Arogo lenirtemi South Korea nung sorkar tashi itta alitsü atema ayongzük.

Christian Council of Korea (CCK) Tir, Rev. Jung Seoyoung-i, "Asenoki tang tensa ya tanemi repranga alitsüla aser Tir Yoon agienba dak sendakba nung Constitutional Court-i agütsüba obendang atatsüla. Tir Yoon agienyonga mesüra magienyonga asenoki asen linük tashi itta alitsü atema sarasademtsüla," ta ashi.

"Asen nija takdang nung ola madoki sarasademba tajungba asütsü. Yimsü temeden tamendakdakji liberal democracy atema asenoki sarasademdi," ta paisa metetdaksü.

Presbyterian Church of Korea Association nung Tir, Rev. Kwon Soon-woong-i, "Korea Arogoi sarasademtsüla. Putiotsü ajakji Tsüngrem tashi kükok lir, anungji asenoki asen linük aser loktiliba junga yangertsü atema sarasademtsüla. Presbyterian tangatetba nung, democracy ya tashi balala nung amenoka lir. Calvinism tangatetba nung, democracy atema ajak liromedemtsüla," ta ashi.

"Tang ama tayongzükba aika aliba mapang ka nung Korea Arogoi metzü aser tesangwa

shilem agitsüla. Tesangwa temaitsü Laishiba tesayuba nung amendaker mangdang yur inyakba aser metzü tetezü tanepsüba aser telemsa ajanga yirua aliba linük tanaben yangershiba lir," ta paisa metetdaksü.

Tesüiba mapangtem nung Arogo metokmeperi aija Chongsin University nung taoba mapang Tir, Dr. Jung Sung-gu-i, "Tesüiba küm 50 tsüngda Korea Arogoi Khrista osangtajung nungi pilaogo. Temeshi sabangtem nung ochi indang sayutsütsü melen alima rongsen tsütsü azükaru indang sayutsüngiba ang teimba kümogo," ta ashi.

"Temeshi sabang nungi Amos aser Habakuk kakettem nung aliba osangtem tasü itta sayutsüngitsüla," ta paisa metetdaksü.

Soongsil University nung professor emeritus, Dr. Kim Young-i, "Iba tensa atema Tir, Yoon kija nem tai metongloksütsüla. Tir Yoon-i martial law sangdongbaji tera tali asütsüa akok. Ajisüaka ghonda trok tsüngda pai iba sangdong agiena liasü, anungji ibaji linük anema inyakba ama mezüngshitsüla," ta ashi.

Taoba mapang Seoul Conference of Korean Methodist Church nung lenir, Rev. Won Sung-woong-i, "Iba linük atema Tsüngremi melung ataloktsü asoshi Korea Arogoi sarasademtsüla. Tsüngremi Pa lenmang lapoktsütsü," ta ashi.

AO OSHI ANGAZÜKDAK:

TANÜ ANGAZÜKTSÜBA OJANG

Tatoktajang

(adj) aso ajen tesütep aser tobur tajung (handsome)

* Aiür aikati tatoktajang asangur aginür.

Tatong

(n) nisung ka sülen (next to)

* Ozü kinunger rongnung kü den tatong kenu tetsür ka lir.



OLONG PAITEP # 7015

Grid for OLONG PAITEP # 7015 with numbers 1-16 in various positions.

TIPLEN

- 2. Auonung chiyongsü asenba
5. Mangyimba mapang
7. O tamendakdak
8. Peidak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

- 1. Lenmang
2. Aor kidong ka tenüng
3. Tenarong maten
4. A ___ g
6. Mopung apodoka
9. Tongtipang tagitsü
10. Menungra bilem
11. Aiür
13. S ___ k
14. T ___ r

OLONG PAITEP # 7014 TELANGZÜBA

TIPLEN :

- 1. Tesangra, 5. Mungo, 7. Kisen,
8. Salem, 12. Semki, 14. Kilem,
15. Kensü, 16. Sangpang.

LANGTSÜNGLEN :

- 1. Temesen, 2. Raksa, 3. Aon,
4. Aso, 6. Nile, 9. Alizüng,
10. Omen, 11. Lemta, 13. Ola,
14. Kin.

NAI-A YA METETTER MA



Indian television nung mapang ka nübertemi kanga sapua repringba CID serial nung world record ka yanglua lir. Iba ya episode ajunga khen nung dang shoot asüba lir. Parnoki 111-minute episode yanglu aser iba atema cameraman-i seret 37 taret steady body cam ka bener shoot asü ta serial nung actor tem Dayanand Shetty aser Aditya Srivastava nati ashi.

CM Khandu-i sorkar mapa inyakertem dang ochimashi meinyaktsü tuyur



Itanagar, December 18, 2024 (Agencies): Arunachal Pradesh Chief Minister Pema Khandu nübertem aser talisa sorkar mapa inyakertem dang pei nija ajangzüksü atema ochimashi mapa meinyaktsü metetdaksüogo.

Arunachal Pradesh Police (APP) nung 49th batch indang Passing-Out Parade ceremony nung jembidang pai iba tetuyuba agütsü.

Banderdewa nung aliba Police Training Centre (PTC) nung agiba sentong nung CM Khandu-i "Contract nung inyakba ANM aser GNM nurse tem regularization asütsü atema

sen aika meshiba olulu ka ni angashiogo" ta Khandu-i ashi.

"Ni ochimashi anema teti shiyonga arur. Ni Director General of Police (DGP) Anand Mohan dang iba ken o jungjunga bushisüngdangtsü mepishiogo" ta pai ashi.

"State Cabinet-i health department nung contract nung inyakba nurse tem shilem lemsar regularize asütsü telemtetba agiogo. Ibaji metetaka nisung kari sen agüja regularize asütsü merangba atema süngmanger" ta CM Khandu-isa metetdaksü.

Paisa police nung nübo tassen shimokertem dang

ochimashi meinyaktsü ayongzükogo.

Khandu-isa Home Minister Mama Natung, DGP Mohan aser PTC Principal nunger nem tenüngsang agütsü.

49th batch nung constables 885 aliba atema kanga pelar aser iba ya training centre nungi nisung teimtiba pass-out asüba lir, ta pai ashi.

Iba passing out parade nung Home Minister Mama Natung, Advisor Home Mutchu Mithi, Minister Balo Raja, Minister Nyato Dukam, MLA Jikke Tako, MLA Nabam Vivek, Chief Secretary aser police kinungertem aden.

Assam litterateur 3-i Sahitya Akademi Award 2024 angu

Guwahati, December 18, 2024 (Agencies): Assam nungi nüngtugu litterateurs asem nem Sahitya Akademi Award 2024 agütsüogo.

Assamese poetry collection 'Pharingbore Bator Katha Jane' atema Sameer Tanti,

Bodo oshi nung 'Swrni Thakhai' novel atema Aron Raja aser 'Bhaskaracaritam' Sanskrit poetry collection atema Dipak Kumar Sharma nunger nem sempet agütsü.

Chief Minister Himanta Biswa Sarma-i takok angur ajak nem tenüngsang agütsü.

Parnoki literary nung shilem agiba ajanga Assam nung literary wadang kanga takangba akümtsü ta CM Sarma-i ashi.

Iba sempet ajanga tarutsü nung kaket zülurtem ajungmesor ta Assam chief minister-isa ashi.

'Raj Bhawan Chalo' sentong nung Assam Congress lennir ka asü



Guwahati, December 18, 2024 (Agencies): Bodbarnü Assam nung Congress-i "Raj Bhawan Chalo" sentong agidang arishi küm 45 tain Advocate Mridul Islam asü.

South Kamrup kübok Boko nungi Mridul Islam ya State Congress Legal Cell züngsem liasü.

Parnoki police den raratepdang lao aser iba sülen Gauhati Medical College and Hospital (GMCH) nung anepalutsü aoba sülen pa asü.

State sorkari smart meters mapa tenzükba, Adani ken o aser "One Nation, One Election" tebilemba anema Congress party-i lungkak aitba sentong ka ayongzüka agi.

Idangji Raj Bhawan anasa Congress pusemer meyirjang aika adenshi aser yimyim ayima takhangbatem agüja liasü.

Lungkak aiterteri police barricades nungpoker Raj Bhawan-i aotsü merandang tensa mejungi aküm.

Police-i tensa azüoktsü merandang tear gas amshi aser iba jagi lungkak aiterteri jenshi. Idangji Mridul Islam süchia ao.

Islam indang post-mortem examination report anguba sülen ang pa asüba kuli tejangja metettsü. Iba tatalokba nung nisung shinga meyiru ta police ketdangsur kati ashi.

Police aser Congress pusemertem raratepdang

Assam Congress president Bhupen Kumar Borah aser taoba Rajya Sabha MP Ripun Bora naprong ali nung lao aser police-i tena apu.

Congress-i police inyakim khukhua aitsüogo aser parnoki timi lungkak aitdang police-i tashiyim amshi ta tai tongloktür.

Congress lennirtemi Mridul Islam asüba atema bushisüngdang asütsü takhangba agütsüogo. Ajisüaka police-ibo sangdong kecha magütsü lir.

Iba tatalokba atema public aser yimtenren lennirtem jashiteper aser opposition lennirtemi tasür advocate nem temeten meshir.

MENUNGRASETER



Asür Jabaso Moanir Jamir
19th December 2022 – 10th December 2024

Temeim Moanir,

Pongmang ka amai dang na alima nung tatsüka tang lir pila oadokogo. Ne arishi kanga tatsü, saka nai onok mulungjang ajak nung temeim tali jangjashidaksüogo. Na onok den meliaka onok mulungjang nung na teti taküm alitsü.

~ Temeim Oja, Oba, Otsü, Obou aser kinungertem.

Office of the

Rionsganger Putu Menden Kelingmen

P.O. Changtongya- 798613
Dist. Mokochung: Nagaland

TAKOK KHONANG ATEMA TENÜNGSANG AGÜTSÜR



Wb. Imkongchuba Jamir aser Wt. Nükenmenla tena jabaso Mr. Nüngsangliiba, Asst. Mechanical Engineer (Under works and housing Dept.) menden nung 2024 NPSC, CTSE tatidang nung takok ngutetba atema Kelingmen Rionsganger Putu menden-i anir nübür ajaki tenüngsang agütsür. Maneni Tsüngremi tenzüker taküm nübür atema lenren ajak nung moajangma.

Sd/-

O Alem Jamir
Council Chairman

Sd/-

Obendangba Jamir
Secretary

TENÜNGSANG ASER TETUSHI AGÜTSÜR

Mangmetong Watsü Telen-i item lanurtemi takok tajung anguba ajanga yimer nem khonang nüngsang bener arutsü nung pelaba den tenüngsang tetushi agütsür.

1. Kr. Temjentula Imchen D/o Wb. Manendangba & Wt. Bendangmongla, All India Institute of Medical Sciences (AIIMS) nung Nursing Officer ngutet.
2. Sb. Imchungwati Imchen, S/o Wb. Posenungsang & Wt. Nangshili, SDO (Civil Engg) Dept. of PHE nung mezüngbuba jenjag ngutet.

Maneni asen Teyangluri nenok taküm aswer wadang nun glen aniangma.

Sd/-

Tareplila Pongen
President, MWT

Sd/-

Moarenla Jamir
Secretary, MWT

Russia-i North Korean sepaitasü mang tejak rongdoker: Zelenskyy

Kyiv, Luchii/December 18 (Agencies): Ukraine Tir Volodymyr Zelenskyy-i social media sapang X (Twitter) nung video ka lemsatepba nung Russian sepaitemi North Korean sepaitem sür aliba tasü mang maremdang Russia indang Kursk region nung ayak miimbangtsü mechi tejak rongdoksür, ta ashi.

Zelenskyy-i lemsatepba video nungya North Korean sepaitem tepsetdak longdaka aliba amai sayu. Iba sülen rer agi lapanga alidak parnok temang nung sepaitemi mi senloksür ama ajitet.

Iba video lemsatepba nung Ukraine tiri, "Küm aika raraba sülena, Russia nungeri pei atema kisü ng meblemetsü südi ta bilema alidang, asenoki tamajungba angur. Russia-i Ukraine positions sapangtsü atema North Korean sepaitem yokba kisü ng masü saka item nisungtem asüba miimbangtsü meranger," ta zülutsü.

Parnoki North Korean sepaitem aliba miimshitsü merang aser training aser

renemshiba mapanga parnok tejak mesayutsü tenokdangba agütsü ta pai ashi.

"Aser tang, ozü nokinketer den mezü ng raraba sülen, tongpang nung tepsetba North Korean sepaitem tejak Russia-i rongsatsü meranger. Ibai akumtsübo mesayuba yimya lir, koba tang Russia nung lir, meimchir asoshi akumtsübo mali," ta pai zülü.

"North Korea nungertem Putin asoshi raratsü aser asütsü kuli kecha maka. Aser parnoki yamaji inyakera, Russia-i parnok mezü ng meshi ang asür. Iba tamachi mapa ya anentsüla – tesunep agi anentsüla," ta pai ayongzük.

Hopta tatemlen Russia indang Kursk region nung Russia asoshi raraba North Korean units nungi sepai 30 shi tepset mesüra yirur, ta Ukraine indang HUR military intelligence agency ajanga Hombarnü shia liasü.

Ukraine-i North Korea nunger akoksaba indang tejangja tang mezü ng buba sangdonger alitsü. HUR ajanga

ashiba agi, North Korean sepaitem ya Plekhovo, Vorozhba, aser Martynovka yimtsü ngtem anasa asü mesüra yiru, saka parnoki kuli magütsü.

Washington nungia Pentagon odongtar Major General Pat Ryder-ia North Korean sepaitem asü-amaba ajitet ta shia liasü.

Kremlin-i iba indang nung telangzüba magütsür aser iba onük ya Russian Defense Ministry nem tuloktsü, shirnok ola madoker. North Korean sepaitem lir mesüra mali ta Russia-i shia mali. Pyongyang-ia mezü ng boba iba osang ya taila ta shia liasü, saka mapang tatsüka lir North Korean ketdangtsür kati iba ama sepai yokba ya ozü ng agi melaba ama asütsü ta ashi.

Kursk region nung North Korean sepaitem aliba indang osang Ukraine-i October ita mezü ng sangdonga liasü aser mapang tatsüka lir parnok den raraba aser asü-amaba indang ashi. North Korean sepai 11,000 shi Russian sepaitem den külemi Ukraine den rarar, ta Kyiv-i ashir.

Vanuatu menoknok lendong nung asür 14 jungogo

Port Vila, Luchii/December 18 (Agencies): Menoknok tesashi ka agi Vanuatu kongshia nisung 14 tashi asüba sülen tekümzü kertemi kanga aritepa taküm alirtem kümzü ktsü merangdar.

7.3-magnitude tesashi menoknok kati linük yimtiba Port Vila Mongolbarnü kongshiba sülen ki aika ajarepogo, tesem aika nung anentsüh aluba den power aser telecommunications infrastructure tem raksatsüogo.

International Federation of Red Cross and Red Crescent Societies Asia Pacific tekolakba Katie Greenwood-i Bodhbarnü ashiba agi, iba menoknok lendong nung nisung 14 asüba ketdangtsürtemi jangjashitsüogo aser nisung 200 tashi Port Vila indang mozüki tongtiba nung temang anepaludar.

Canada nung asoba

osangbener Dan McGarry, shiba Vanuatu nung küm 20 dak tema alir pai ashiba agi, tekümzü kba maparen tembanga inyakba sülen asürtem tali akümtsü.

"Asürtem tali akümtsü ta tsü bua bilemer aser sorkaria lendong nung asürtem tali akümtsü imla atadar," ta McGarry-i Al Jazeera dang ashi.

McGarry-i ashiba agi, ki chireper aliba nung sabanger alitsü ta bilemertem tekümzü kertem kümzü ktsü merangdar.

"International shipping terminal anasa anentsüh tulu ka aluba nung nübürtem sabanger alitsü ta bilemer. Iba tesem nung tang tashi nung nisung trok asü baba jangjaogo," ta pai ashi.

Australia aser New Zealand nati Bodhbarnü nungi tenzüka inyaksangshitsü atema medical

aser rescue team tem yokogo.

"Yashi menoknok anokba sülen Australia nungertem Vanuatu nungertem den nokdaka lir. Iba lendong atalokba atema kanga sasasete bilemba lemsateper," ta Australia Treasurer Jim Chalmers-i Bodhbarnü osangbenertem den sensaksemba mapang ashi.

"Osang ajanga menoknok agi teraksatsüba tulu adokdaksüba jangjaogo aser Vanuatu sorkari mepishiba sülen onoki tanü teyaritem yokogo," ta Chalmers-isa shisem.

Coordination of Humanitarian Affairs atema UN Office-i ashiba agi, asetkong nung nütsü ng yongsük 335,000 shir lir aser iba menoknok ajanga nübürtem asemsü nung ka dakbo kongshio.

(Maneni tapak 8 nung...)

Mitkar lenir Kirillov tepsetba mechi Uzbek nunger ka puogo

Moscow, Luchii/December 18 (Agencies): Moscow nung senior general Igor Kirillov aser pa den yariteper ka tepsetba mechi Uzbekistan nungi arishi küm 29 tain tebur ka pua lir ta Russia indang security service ajanga ashir.

Radiation, Chemical and Biological Protection Forces tekolakba Lt Gen Igor Kirillov ya Mongulbarnep residential block ka kima lia scooter nung miima inoka aliba tapoktsü oset ka remote amshia pokdaksü.

Tenü ng agüja malisang suspect ya Ukraine nunger itdangiter temi shim, ta Russian security service ajanga ashi.

Ukraine indang security service-i iba Igor Kirillov

tepsetba ya par mapa lir ta shiogo.

Russia indang chemical weapons tekolakba Kirillov ya "legitimate target" liasü aser pai rara mapang mapa tamajung inyak ta Ukraine nunger osang ajanga ashir.

Hombarnü Ukraine-i arishi küm 54 tain Kirillov ya meliaka nokdanga aliba chemical weapons aika pai amshi ta aitsü. Iba taitüba ya Russia-i magizüker.

Russian Federal Security Service's (FSB) public relations centre ajanga Bodhbarnü ashiba agi, pua alisang arishi küm 29 tain ya kiralongra mapa inyak ta temulung melemi lir.

Asü ngdangyaba mapang pa

ya Ukrainian special services ajanga shim ta pai rasaa ashi, ta sangdong ka nung ashi.

FSB ajanga sayuba video ka nung temulung melemi alisang ya kou tanak aser teka alener camera nung indang-indanga jembia liasü.

Kirillov tepsettsü mechi pa nem senpet amai sen \$100,000 agütsü aser European Union-i aotsü temelaba agütsü ta pai ashir amai liasü.

Ukraine totuyuba nung pa Moscow-i aru aser kidang yangluba tapoktsü oset ka agütsü, ta FSB ajanga ashi.

Pai iba tapoktsü oset ya electric scooter nung yutsü, koba pai Kirillov aliba ki telungi aidak anena yutsü, ta FSB ajangasa

ashi.

Pai iba sülen gari ka amshia Kirillov aliba ki meita ao aser gari indang dashboard nung camera ka inoka Ukraine nunger Dnipro yimti nung amshirtem dangi video livestream yoka liasü, ta sangdong nungsa shia liasü.

Kirillov par kidang nungi ayazüka aluba angudang temulung melemi alisangi button nung anemtsü ashi aser bomb ya apok, ta FSB ajanga ashi.

Küm asem jungnüa jakdang Russia-i Ukraine amak tenzü kba sülen Russia linük telung nung mitkar tepseter rongnung Kirillov ya senior most ka südi ta amanger.

Ukraine-i ken o benoka aliba

den arishi küm 54 tain Kirillov ya taoba mapang UK-ia Ukraine nung chemical weapons amshiba mechi tenokdangba agüja liasü.

Pa lenisüba kübok Russia-i chemical weapons 4,800 ben dak tema amshio, ta Ukraine indang SBU security service ajanga ashir.

Moscow-i aji magizüker aser parnoki chemical weapons aika yua aliba tesüsa 2017 nung raksa indok ta ashir.

Russian Foreign Ministry ajanga Bodhbarnü sangdong ka nung Kirillov tepsetba onük ya Hokulbarnü United Nations Security Council senden nung Russia-i benoka jembitsü ta shiogo.



1buba DCN (Dimapur, Chumokedima, Nuiland) Ao Open Badminton Tournament 2024 December 16 aser 17 nü kanga takok ngua asayaogo. Noksa nung takok angurtem den alakteta jaokertem tangokba angur.

Halep & Cruz na nem Australian Open qualifying atema wildcards agütsü

Luchii/December 18, 2024 (Agencies): Simona Halep nem Bodhbarnü Australian Open qualifying atema wildcard agütsüogo.

Grand Slam ana tashi koker aliba asayar ya tenokdangba agütsür aliba mozü amshiba atema tenokdangba agütsüba sülen tang meyaipa arur asayatsü merangba mapang ka lir.

Kasa mapang nung küm atema mezüngbuba Grand Slam qualifying asoshi wildcard ya arishi küm 16 tain Cruz Hewitt nema agütsüogo. Cruz ya taoba mapang Australia nung world number one asayar Lleyton Hewitt'er jabaso lir.

Arishi küm 33 tain Romania

tsür Halep ya 2022 küm October ita asaya nungi anentsü aser la nem küm pezü atema tenokdangba agütsür aliba ita teku dang küm süba sülen la March ita nungi asaya tenzük.

Taoba mapang world number one asayar yagi, lai asaa tenokdangba agütsür aliba mozü amshi masü ta shiogo.

"Küm asem sülen Australia-i meyipa oa asayatsü janradema bilemer aser iba maongka agütsüba atema asayamung ayongertem dang kanga pelar," ta Halep-i ashi, shiba tang jenjang 887buba nung lir.

"Ni 2025 season atema renemshitsü atema kanga meranga inyaka arudar," ta

Halep-i ashi, shiba 2018 küm Melbourne nung runner-up liasü.

"Kü indang career nung Australian Open nung asayaba mapang tajangshiba tajung aika lir anungji ni Melbourne nung Australia nung fan tem matsüngdang asayatsü matateter," ta laisa shisem.

Küm 30 shi tejekdang Cruz Hewitt tebu qualifying wildcard ka ajanga mezüngbuba Australian Open atema qualify asüba sülen Cruz nema kasa maongka agütsüogo.

Qualifying asaya tatembangbuba round ya January 9 nü asayatsü aser iba sülen anogo asem lir main-draw asayatem tenzüktsü.

Spinner Ashwin international asaya nungi anisüngzüker

Luchii/December 18, 2024 (Agencies): India nung nungtugu off-spinner Ravichandran Ashwin-i international cricket asaya nungi anisüngzüksü telemtetba agiogo.

Arishi küm 38 tain asayar, shiba Test asaya puti otsü nung wicket timtiba agiba asayatem rongnung tenetbuba lir, pai pa asaya nungi anisüngzüksü atema telemtetba agiba ya Brisbane nung Australia den tasembuba Test draw asüba sülen sangdonga liasü.

Pai Test asaya 106 nung wicket 537 agi aser pa indang average 24 liasü. India nung bowler tem rongnung Anil Kumble (619) sülen pai wicket timtiba agir lir.

Kasa mapang paisa Test asaya nung batting amenba mapang century trok yangluogo aser pa indang average 25.75 lir.

"Ni India nung cricket asayar ka ama international level nung format ajak nung tanü ya tatembangbuba anogo asütsü," ta Ashwin-i Gabba nung news conference ka nung ashi.

"Ano ni mapang tatsükabo asayatetsü ta bilemer, saka ni joko club jenjang nung dang asayatsü," ta paisa shisem.

Ashwin-isa, one-day internationals asaya 116 nung wicket 156 agi aser T20I asaya 65 nung wicket 72 agia lir.

Pa ya 2011 World Cup

akokba India team nung densema liasü, saka pa iba asayamung nung asaya ana nung dang asaya liasü.

Ashwin ya format ajak rongnung Test nung kanga junga asayaba atema tali tajungba bilemtetsü. Pai wicket pongungu ya 37 ben agir lir aser asaya ka nung wicket pongu timtiba agirtem rongnung Sri Lanka nung Muttiah Muralitharan sülen pa tanabuba jenjang nung lir.

India team England den taoba asayamung asem asayaba mapang Ashwin-i wicket timba agir lir, kong taküm England team kidang 4-1 agi akokba asayamung nung pai wicket 24 agiba densema lir.

Captain Rohit Sharma-i ashiba agi, iba asayamung metenzük tsüngda Ashwin-i asaya nungi anentsü asadanga liasü, saka pai pa iba asayamung nung danga asayatsü mepeshia liasü.

Ashwin mezüngbuba test nung masaya aser tanabuba test nung pai wicket ka agia liasü.

"Pai pa kechi inyaktü aji kanga jangja meteta lir aser team-i pa telemtetba pusemer," ta Rohit-i ashi.

"Pa India team nung kanga tongtibang asayar ka liasü aser pai tongtibang asaya aika koktsüogo. Iba telemtetba agitsü ya pa melung aser pai tang ya mapang shitak ta bilemra yamaji südakjang," ta paisa ashi.

Smriti Mandhana-i otsü tasen ka yangluogo

Luchii/December 18, 2024 (Agencies): West Indies den tang asaya aliba asayamung nung India tsür Smriti Mandhana-i maneni kanga junga asaya-a tanabuba T20 asaya nung half century ka yangluogo.

Harmanpreet Kaur maliba mapang la lenisüba nung team asaya aser lai ball 41 nung run 62 yanglu India team-i asayar 9 out sür run 159 yangluba nung teyari tulu agüja liasü. Iba asaya nung Richa Ghosh-ia run 32 yanglua liasü.

Asaya nung half century ka yangluba sülen Mandha ya tetsür T20 asaya nung half-century timtiba yangluba asayar kuma otsü tasen ka yangluogo. Lai tang tashi nung half-century

29 yanglur lir.

Iba record ya taoba mapang Suzie Bates-i bener liasü. Lai half-century 28 yanglua liasü. Ajak senteper Bates-i run 50 ya 29 ben yangluogo, saka lai century-a ka yanglua lir. lai T20 asaya nung half century 28 aser century ka yanglur lir.

Mandhana-i T20Is asaya nung tashi nung century ka danga yanglua mali. Mandhana aser Bates na sülen half century timtiba yanglurtem rongnung Australia tsür Beth Mooney lir. Lai half century 23 yanglua lir. Iba sülen Sarah Taylor (22) aser Sophie Devine (21) na pezübuba aser pongububa nung lir. Devine-ibo century-a ka yanglur lir.

Ajisüaka Mandhana-i half-century ka yangluba ya India team asoshi tanabuba T20I akoktsü atema teperi masü asü. WI team nungi Hayley Mathews-i out mesüi ball 47 nung run 85 yanglu aser parnoki over 15.4 nung dang India team-i yanglur aliba run menepa asaya kokogo. Parnoki iba asaya wicket 9 agi koka liasü.

Tanabuba innings nung India team nungi bowler temi ball junga montet aser parnok ajak indang economy rate 6 dak tema liasü. Team ana tsüngda T20I asaya asem asayatsü aliba nungi kaka koker lir. Tatembangbuba T20 asaya ya Brehostibarnü (December 19) Mumbai nung asayatsü.

BENDANGLI OSANG : Tapak 7 nungi...

Vanuatu menoknok lendong nung asür...

"Telecommunications ano meyangluteti lir aser iba ajanga kinük nung aliba tesemtem nungi mapa shitak nung osang magiteter," ta UN office yagisa shisem.

"Lenmang raksaba ajanga airport aser water port-i aotsü atema tetsükdaksü adoker lir. Tang kanga nungdakbatem

United States indang diplomatic missions amenoka aliba kia kanga mejungi kongshia ki shilem ka chirepogo aser mezüngbuba floor ajarepogo.

McGarry-i ashiba agi, iba lendong ajanga iba asetkong nung alirtem ajak dak kongshitsü, kechiyong parnok lokti kanga tila lir.

"Nisung ajaki nisung ajak meteta lir, anungji nisung asüba ya onoki kanga meteter. Tanga tesem dang nungi idaki tajangshiba balaka asür," ta McGarry-i ashi.

Ajisüaka McGarry-i ashiba agi, Vanuatu nung alirtem yipru amala lendong balala agi mapangshia kongshir anungji nisung süaka nüburtem süngjema dang lir.

"Nisung süka nüburtem süngjema dang lir. Nüburtemi kanga teka amteper inyaka arudar aser kati ka atasatapa inyaksangshidar," ta pai ashi.

"Vanuatu nung alirtem maneni teka amteper inyaksangshidar," ta McGarry-i ashi.

rongnung healthcare, tejenokdak, tzü temerek aser emergency communications tem y a n g l u s h i t s ü b a densema lir.

Australia nung Michael Thompson, shiba Vanuatu nung zip line adventure business ka inyaker pai Facebook ajanga ashiba agi, tekümzüka maparen nung pai teyari agütsüdar aser manger mesangwa tsüngda nisung asembo kümzükogo.

Britain, France, New Zealand aser

DIMAPUR BRANCH
Nyamo Lotha Road (Church Road)
Dimapur- 797112, Nagaland,
Email: dimapu@bankofbaroda.com

GARI TAYOKTSÜ LIR

IMKONGSUNEP nem Bank of Baroda, Dimapur Branch-i senotsü teyari agüja aliba vehicle/Equipment aser sentsüh maotetba ajanga gari sota ayuba tayoktsü lir.

Iba gari alitsü jangrartemi tsüngtong arua gari asadangtsü aser gari indang osang tejangja agitsü atema ken o dak sendaka aliba ketdangsur den tongteprateeptetsü. Offer shiti den gari atema Earnest Money Deposit (EMD) ama sen 1,66,500/- (Rupees One Lakh Sixty Six Thousand Five Hundred Only) refundable/adjustable Banker's Cheque/DD benoktsüla. Gari alitsü tebilemba alirtemi gari atema offer letter sealed envelope ka nung "Quotation for purchase of vehicle No. NL-07/CC-6043" aser teküboklen shisema aliba gari tenüng zülur ketdangsur nem 20.01.2025 nü nikonngtsütsü 4:00 ako tashi nungbo benoktsüla. Sealed quotations ya 20.01.2025 nü nikonngtsütsü 5:00 ako nung Bank of Baroda, Dimapur Branch nung gari alitsü tebilemba aliba nisungtem matsüngdang lapoktsü. Bid takok ngua asüri quotation lapokba anogo nungi tenzükter anogo 05 (pongu) tsüngda sen agütsütsüla mesüra Branch tekolakbai atakzüksüba mapang tashi nung benoktsüla, ajita mesüra pai deposit süa aliba EMD meyipa mangutsü aser garia yokadoktsü. Vehicle/Equipment ya Bank-i latetja aliba jenjang dang nungi tekübokba nung mayoktsü.

Ken o dak sendakba nung tashi agüja aliba ketdangsur ket nung kuli kecha magütsür offer tem agizüksü mesüra magizüksü atema tashi lir. Gari ya mapang inyakba anogotem nung Bank inyaksangshia aliba mapang asadangtetsü.

Sl.No.	Vehicle Make and Description	Reserve Price
1	ISUZU V CROSS 4WD MT Z (NL-07/CC-6043) Engine No.: AAG662 Chassis No.: M3GTGS876PB200115 Year of Manufacture: 04/2023	Rs. 16,65,000/-

Date: 19.12.2024
Place: Dimapur
Branch Head
Bank of Baroda, Dimapur Branch

DIMAPUR BRANCH
Nyamo Lotha Road (Church Road)
Dimapur- 797112, Nagaland,
Email: dimapu@bankofbaroda.com

GARI TAYOKTSÜ LIR

YUNGMEI KONYAK nem Bank of Baroda, Dimapur Branch-i senotsü teyari agüja aliba vehicle/Equipment aser sentsüh maotetba ajanga gari sota ayuba tayoktsü lir.

Iba gari alitsü jangrartemi tsüngtong arua gari asadangtsü aser gari indang osang tejangja agitsü atema ken o dak sendaka aliba ketdangsur den tongteprateeptetsü. Offer shiti den gari atema Earnest Money Deposit (EMD) ama sen 52,700/- (Rupees Fifty Two Thousand Seven Hundred Only) refundable/adjustable Banker's Cheque/DD benoktsüla. Gari alitsü tebilemba alirtemi gari atema offer letter sealed envelope ka nung "Quotation for purchase of vehicle No. NL-07/CC-6843" aser teküboklen shisema aliba gari tenüng zülur ketdangsur nem 20.01.2025 nü nikonngtsütsü 4:00 ako tashi nungbo benoktsüla. Sealed quotations ya 20.01.2025 nü nikonngtsütsü 5:00 ako nung Bank of Baroda, Dimapur Branch nung gari alitsü tebilemba aliba nisungtem matsüngdang lapoktsü. Bid takok ngua asüri quotation lapokba anogo nungi tenzükter anogo 05 (pongu) tsüngda sen agütsütsüla mesüra Branch tekolakbai atakzüksüba mapang tashi nung benoktsüla, ajita mesüra pai deposit süa aliba EMD meyipa mangutsü aser garia yokadoktsü. Vehicle/Equipment ya Bank-i latetja aliba jenjang dang nungi tekübokba nung mayoktsü.

Ken o dak sendakba nung tashi agüja aliba ketdangsur ket nung kuli kecha magütsür offer tem agizüksü mesüra magizüksü atema tashi lir. Gari ya mapang inyakba anogotem nung Bank inyaksangshia aliba mapang asadangtetsü.

Sl.No.	Vehicle Make and Description	Reserve Price
1	NISSAN MAGNITE MT XV (NL-07/CC-6843) Engine No.: B4DF424E051485 Chassis No.: MDHFBADD0P9108500 Year of Manufacture: 09/2023	Rs. 5,27,000/-

Date: 19.12.2024
Place: Dimapur
Branch Head
Bank of Baroda, Dimapur Branch

BILEM DANGANG
"Mapa ka inyaktang nung dang akoktsü makoktsü jangjatsü."